

## FRAMKVÆMDARÁKVÖRÐUN FRAMKVÆMDASTJÓRNARINNAR

2015/EES/23/17

frá 17. mars 2014

um breytingu á ákvörðun 2011/130/ESB um að setja lágmarkskröfur um vinnslu skjala yfir landamæri sem undirrituð eru rafrænt af lögbærum yfirvöldum samkvæmt tilskipun Evrópuþingsins og ráðsins 2006/123/EB um þjónustu á innri markaðnum

(tilkynnt með númeri C(2014) 1640)

(2014/148/ESB) (\*)

FRAMKVÆMDASTJORN EVROPUSAMBANDSINS  
HEFUR,

með hliðsjón af sáttmálanum um starfshætti Evrópusambandsins,

með hliðsjón af tilskipun Evrópuþingsins og ráðsins 2006/123/EB frá 12. desember 2006 um þjónustu á innri markaðnum <sup>(1)</sup>, einkum 3. mgr. 8. gr.,

og að teknu tilliti til eftirfarandi:

- 1) Falli þjónusta þjónustuveitenda undir gildissvið tilskipunar 2006/123/EB eiga þeir að geta lokið málsmeðferð og formsatriðum, sem eru nauðsynleg til að fá aðgang að þjónustustarfsemi og að stunda hana, fyrir milligöngu upplýsinga- og þjónustumiðstöðva og með rafrænum hætti. Innan þeirra marka sem sett eru í 3. mgr. 5. gr. tilskipunar 2006/123/EB geta enn verið tilvik þar sem þjónustuveitendur þurfa að leggja fram frumrit skjala, staðfest endurrit eða löggilta þýðingu til að ljúka slíkri málsmeðferð og ganga frá formsatriðum. Í slíkum tilvikum geta þjónustuveitendur þurft að leggja fram skjöl sem undirrituð eru rafrænt af lögbærum yfirvöldum.
- 2) Notkun yfir landamæri á útfærðum, rafrænum undirskriftum sem eru studdar fullgildu vottorði hefur verið auðvelduð með ákvörðun framkvæmdastjórnarinnar 2009/767/EB frá 16. október 2009 um ráðstafanir sem greiða fyrir notkun rafrænnar málsmeðferðar með upplýsinga- og þjónustumiðstöðvum samkvæmt tilskipun Evrópuþingsins og ráðsins 2006/123/EB um þjónustu á innri markaðnum <sup>(2)</sup>, sem m.a. skyldar aðildarríkin

til að framkvæma áhættumat áður en þessara rafrænu undirskrifta er krafist af þjónustuveitendum og setur reglur um samþykki aðildarríkjana á útfærðum rafrænum undirskriftum sem byggjast á fullgildum vottorðum og gerðar eru með eða án öruggs undirskriftarbúnaðar. Í ákvörðun 2009/767/EB er þó ekki fjallað um snið rafrænna undirskrifta í skjölum, sem lögbær yfirvöld gefa út og sem þjónustuveitendur þurfa að leggja fram þegar þeir ljúka viðeigandi málsmeðferð og formsatriðum.

- 3) Þar sem lögbær yfirvöld í aðildarríkjum nota nú útfærðar, rafrænar undirskriftir með mismunandi sniði til að undirrita skjöl sín með rafrænum hætti geta viðtökuaðildarríkin, sem þurfa að meðhöndla skjölin, lent í tæknilegum vandræðum þar eð snið undirskriftanna er svo fjölbreytt. Til þess að gera þjónustuveitendum kleift að ljúka málsmeðferð og ganga frá formsatriðum með rafrænum hætti yfir landamæri er nauðsynlegt að tryggja að aðildarríki geti tæknilega stutt við a.m.k. nokkur snið útfærðra, rafrænna undirskrifta þegar þau taka við skjölum sem undirrituð eru rafrænt af lögbærum yfirvöldum annarra aðildarríkja. Fastsetning nokkurra sniða útfærðra, rafrænna undirskrifta, sem viðtökuaðildarríkið þarf að geta tæknilega stutt við, myndi efla sjálfvirkni og bæta rekstrarsamhæfi rafrænnar málsmeðferðar yfir landamæri.
- 4) Upphaflega heyrði einungis grunnstig staðlaðra sniða Fjarskiptastaðlastofnunar Evrópu fyrir útfærðar rafrænar undirskriftir undir ákvörðunina. Rétt er að bæta einnig við langtímastigum staðlaðra sniða Fjarskiptastaðlastofnunar Evrópu, sem auðvelda langtímaráveislu upplýsinga sem tengjast gildi rafrænna undirskrifta.
- 5) Fjarskiptastaðlastofnun Evrópu hefur gefið út nýjar tækniforskriftir fyrir grunnsnið (e. baseline profiles) útfærðra rafrænna undirskrifta sem miða að því að takmarka valmöguleika innan viðeigandi staðla og auka þannig rekstrarsamhæfi yfir landamæri. Þessi grunnsnið taka til allra samkvæmnisstiga, allt frá grunnstigi til langtímastigs.

(\*) Þessi EB-gerð birtist í Stjtið. ESB L 80, 19.3.2014, bls. 7. Hennar var getið í ákvörðun sameiginlegu EES-nefndarinnar nr. 280/2014 frá 12. desember 2014 um breytingu á X. viðauka (Almenn þjónusta) við EES-samninginn, bíður birtingar.

<sup>(1)</sup> Stjtið. ESB L 376, 27.12.2006, bls. 36.

<sup>(2)</sup> Stjtið. ESB L 274, 20.10.2009, bls. 36.

- 6) Aðildarríki, þar sem lögbær yfirvöld nota önnur snið rafrænna undirskrifta en þau sem eru almennt studd, kunna að hafa innleitt fullgildingaraðferðir sem gera kleift að staðfesta undirskriftir þeirra einnig yfir landamæri. Þegar sú er raunin, og til þess að viðtökuaðildarríkin geti treyst þessum fullgildingaraðferðum, er nauðsynlegt að koma upplýsingum um þessar aðferðir á framfæri á auðveldlega aðgengilegan hátt nema nauðsynlegar upplýsingar komi beint fram í rafrænu skjölunum, í rafrænu undirskriftunum eða í flutningsmiðlum rafrænu skjalanna.
- 7) Ákvörðun þessi hefur ekki áhrif á ákvörðun aðildarríkjanna um hvað teljist vera frumrit, staðfest endurrit eða löggilt þýðing. Markmið hennar er takmarkað við að greiða fyrir staðfestingu rafrænna undirskrifta ef þær eru notaðar í frumritum, staðfestum endurritum eða löggiltum þýðingum sem þjónustuveitendur gætu þurft að leggja fram fyrir milligöngu upplýsinga- og þjónustumiðstöðva.
- 8) Til að gera aðildarríkjunum kleift að innleiða nauðsynlegan tæknibúnað er rétt að þessi ákvörðun gildi frá og með 1. desember 2014.
- 9) Ráðstafanirnar, sem kveðið er á um í þessari ákvörðun, eru í samræmi við álit nefndarinnar um þjónustutillskipunina.

SAMÞYKKT ÁKVÖRDUN ÞESSA:

1. gr.

**Breytingar á ákvörðun framkvæmdastjórnarinnar  
2011/130/ESB<sup>(3)</sup>**

Ákvörðun 2011/130/ESB er breytt sem hér segir:

- 1) Í stað 1. mgr. 1. gr. komi eftirfarandi:  
„1. Aðildarríki skulu koma á nauðsynlegum tæknilegum úrræðum sem gera þeim kleift að meðhöndla skjöl, sem

eru undirrituð rafrænt, sem þjónustuveitendur leggja fram til að ljúka málsmeðferð og ganga frá formsatriðum fyrir milligöngu upplýsinga- og þjónustumiðstöðva í samræmi við 8. gr. tilskipunar 2006/123/EB, og sem eru undirrituð af lögbærum yfirvöldum annarra aðildarríkja með útfærðri, rafrænni XML-, CMS- eða PDF-undirskrift á hvaða samkvæmnisstigi sem er eða með því að nota tengda undirskriftarumlykju (e. associated signature container) á grunnstigi, að því tilskildu að þær séu í samræmi við þær tækniforskriftir sem settar eru fram í viðaukanum.“

- 2) Viðaukinn við þessa ákvörðun komi í stað viðaukans.

2. gr.

**Gildistaka**

Ákvörðun þessi gildir frá 1. desember 2014.

3. gr.

**Viðtakendur**

Ákvörðun þessari er beint til aðildarríkjanna.

Gjört í Brussel 17. mars 2014.

*Fyrir hönd framkvæmdastjórnarinnar,*

Michel BARNIER

*framkvæmdastjóri.*

<sup>(3)</sup> Stjtið. ESB L 53, 26.2.2011, bls. 66.

VÍÐAUKI

„VÍÐAUKI

**SKRÁ YFIR TÆKNIFORSKRIFTIR FYRIR ÚTFÆRÐAR, RAFRÆNAR XML-, CMS- EÐA PDF-  
UNDIRSKRIFTIR OG TENGDA UNDIRSKRIFTARUMLYKJU**

Útfærðar rafrænar undirskriftir, sem getið er í 1. mgr. 1. gr. ákvörðunarinnar, verða að uppfylla eina af eftirtöldum tækniforskriftum Fjarskiptastaðlastofnunar Evrópu:

<b>XAdES Baseline Profile</b>	ETSI TS 103171 v.2.1.1 <sup>(1)</sup>
<b>CAdES Baseline Profile</b>	ETSI TS 103173 v.2.2.1 <sup>(2)</sup>
<b>PAdES Baseline Profile</b>	ETSI TS 103172 v.2.2.2 <sup>(3)</sup>

<sup>(1)</sup> [http://www.etsi.org/deliver/etsi\\_ts/103100\\_103199/103171/02.01.01\\_60/ts\\_103171v020101p.pdf](http://www.etsi.org/deliver/etsi_ts/103100_103199/103171/02.01.01_60/ts_103171v020101p.pdf)

<sup>(2)</sup> [http://www.etsi.org/deliver/etsi\\_ts/103100\\_103199/103173/02.02.01\\_60/ts\\_103173v020201p.pdf](http://www.etsi.org/deliver/etsi_ts/103100_103199/103173/02.02.01_60/ts_103173v020201p.pdf)

<sup>(3)</sup> [http://www.etsi.org/deliver/etsi\\_ts/103100\\_103199/103172/02.02.02\\_60/ts\\_103172v020202p.pdf](http://www.etsi.org/deliver/etsi_ts/103100_103199/103172/02.02.02_60/ts_103172v020202p.pdf)

Tengd undirskriftarumlykja, sem um getur í 1. mgr. 1. gr. ákvörðunarinnar, verður að uppfylla eftirfarandi tækniforskriftir Fjarskiptastaðlastofnunar Evrópu:

<b>Associated Signature Container Baseline Profile</b>	ETSI TS 103174 v.2.2.1 <sup>(4)</sup>
--	---------------------------------------

<sup>(4)</sup> [http://www.etsi.org/deliver/etsi\\_ts/103100\\_103199/103174/02.02.01\\_60/ts\\_103174v020201p.pdf](http://www.etsi.org/deliver/etsi_ts/103100_103199/103174/02.02.01_60/ts_103174v020201p.pdf)